

Altstadt - Fest in Nürnberg

A mords Reklame überoll !
Su a " Altstadtfest " , des is scho toll.
Die Leit, döi dränga, wü die Narrn,
verstäih toust nix, vur lauter Schmarrn.
Es Bierzelt, des is drücket voll
unds Thermometer stäiht af Null.
Des manst, denn 30 Grad sens ganz bestimmt,
des wou dir drin die Luft abnimmt.
Trotzdem is alles vuller Leit,
und hom am Bier und Musik Freid.
Gsunga werd, daß alles wackelt
und alles hout si unterhakelt.
Die Kibß, döi wern dou einfach gstulln,
die Meckerer soll der Teifel hulln! -
Am Hauptmarkt schmettert die Musik,
getanzt werd vuller Lust und Glück,
heit kennt ma dou kan Unterschied,
denn a die Groußköpf machn miet. -
Af der Pegnitz, dou fohrs Kohn,
" Fischerstechn " wor scho dron.
Woust hischaust grinsen schöi die Leit,
überoll sichst blouß die Freid! -
Net blouß die Junga sen dabei,
die Altn machns gröbti Gschrei. -
Die " Altstadt " is etz Mittelpunkt,
wou es Städterherz am bestn funkt.
Mög des a weiterhin su bleim,
wünscht heit sich jedes Bürgerlein.